

經籍典第四百二十三卷

地志部彙考六

皇清勅修畿輔通志四十六卷

直隸巡撫臣格爾古德序惟我

國家誕受景命中外効職文軌畢同燕京定鼎雖踵前代舊迹而經營締造百度聿新三十餘年以來德澤漸濡建置周密洵足凌軼往古昭示來茲固不恃區區形勢之勝稱天府都會之雄已也在易觀之象曰先王以省方觀民設教古巡狩方岳十二年一舉而畿內甸服則有春秋時巡之典列國諸侯貢詩於王朝爰頒政令以變易民俗而王畿尤爲風化之首自風詩旣廢所可徵取者志乘而已志乘具則美惡昭法戒備此在列服猶不可缺而況京師首善之地乎方歲壬子

詔允閣臣請命各省分輯志書督撫臣上之史館彙萃編次用紀大一統之盛屬以軍興未遑歲事頃者海宇謐寧文治翔洽各省志次第成帙而畿輔通志亦繕稿報竣會予奉

命鎮撫八郡獲受而卒業考其條目綜其義例疆分理析部列族居粵自山川扼塞土田賦稅以及

關津郵傳城郭堡戍之沿襲與夫宦游土著名賢碩彥之遺蹟方土物宜禽魚卉木之產植凡屬職方訓方之所掌道川師選師之所頒辨較若眉列原委爛如以是上備

聖天子體國經野之資下裨大小官司承流敷化之助信所謂綱舉目張班班可考者矣於是申檄所司授工鉅梓裝潢讎校計卷四十有六予例得廁名卷端撰序始末竊因是有憬然滋懼者焉燕之建都邑也遼爲南京金爲中都元爲大都路明改建北京數百年間歷朝規制按籍可考田野何以瘠何以腴軍實何以堅何以脆戶口何以贏何以縮風俗何以淳何以漓軍吏糴糗良錯處或控御失術奸宄孽牙或劑變適宜獄市不擾雖古今殊勢而治忽一理予與諸君子恪秉

簡書撫河山之遼闊軫民庶之殷繁屬守茲土與有均責一或失當卽隕越隨之是則余所執卷三復如涉淵冰者也是書也始於康熙十九年之七月成於二十一年之四月總裁官前巡撫副都御史于成龍監臨提調官叅議董秉忠僉事吳元萊董理官保定府知府紀弘謨總修官翰林院侍講郭棻自餘分纂諸執事俱詳書別簡云康熙二十一年歲次壬戌蒲月穀旦格爾古

德謹撰

直隸守道臣李玠序我

神京凡八郡古幽薊域也於周時爲燕爲晉爲鮮虞無終諸國秦置州縣曰鉅鹿曰邯鄲曰遼西曰右北平曰漁陽上谷漢魏約略因之唐屬河北道宋復分河北爲東西二路千百年來所稱天府之區也故軒轅都涿鹿顓頊都高陽河亶甲都相祖乙都耿暨遼金元明皆建邦茲土我國家亦以定鼎焉豈非形勢之勝足控中外也哉嘗讀禹貢五百里甸服五百里侯服五百里綏服五百里要服五百里荒服知王者同文同軌訖乎東西朔南初無分於疆理而必以京師爲首善者亦居重馭輕之意其勢則然矣今三輔之間分野躔於箕尾於山則太行之峻於水則渾河之險於野則廣川大陵之雄於隍堡則盧龍雕鸞之隘於關塞則居庸扼其前獨石阻其背於陸澤之所產則黍菽之殖魚鹽之利於土風則猶有擊筑賣漿慷慨悲歌之習覽其山川訪諸父老相與憑弔當年如孤竹之清澹臺之介荆高之俠廉藺之功而汲長孺雋不疑京房鮑宣之屬皆有直聲於漢其在晉也劉琨祖逖以賢豪特聞至魏徵宋璟曹彬趙普呂端者亦唐宋間名將相也其他畸人軼事散見於諸說不可勝紀以地若彼以人若此而可弗志哉且

志非獨備記載而已古者天子省方春曰岱秋曰華夏曰衡山冬曰恆岳率五年一舉而其畿內則歲與吏民再相見也其後巡狩時缺乃命太史采風以詔於王於是乎察金穀之盈絀物產之貴賤人類之秀頑時俗之淳漓事無鉅細治有美惡於職靡所不當問不有志何以資考鑑也先是閣臣請修天下郡邑志

天子俞其奏

詔下畿省玠之來也未數閱月而是書適成按圖披籍庶得藉手以報政矣乎

皇清勅修盛京通志三十二卷

奉天府尹

臣

董秉忠序

聖天子御極以來武功震疊文教肆訖幅幘式廓百度咸熙職方輿地之書直省漸次修舉而臣秉忠以叨

簡命作尹奉天乃奉

詔偕鎮帥臣督輯通志事書成將拜手獻之

闕廷謹臆言其端曰帝王以聖德神功膺圖受籙必有王氣特鍾之地締構鴻基而後四表宅心

大業式闢綿寶曆於有永蓋皇天眷命靈祇協應理固然矣

太祖以武功肇造

太宗以文德覃敷

盛京實爲發祥重地

世祖統御萬方燕京定鼎遂爲留都

皇上神謨睿略眷念根本之邦畫疆設鎮分建州郡梯航貢琛款邊內附者億萬計版圖所隸聲教所敷書契以來未有加焉臣竊按盛京古營州之域星躔箕尾拱長白挾巫閭襟繞滄溟跨馭大漠蓋居出震之方扼天下形勝之首也稽之昔乘未有專書若是乎地靈獻瑞鉅典聿煌端以待開天立極之

聖矣邈觀古往治化莫盛於周之成康雅頌所傳必推本古公文王岐豐之舊凡山澤險易之宜宮室苑囿之富與夫里巷風謠昆蟲草木莫不備悉誠以王業所自川嶽懷柔已奠宗社磐石之基而祖宗積功累仁創制立法皆裕千萬世子孫久安長治之計今

盛京固我

國家岐豐也是志也列其山川疆土則將遡高山荒作之勤稽其建置經畫則如述考卜燕貽之旨搜其民風物產則擬進豳風七月之章於以仰副

皇上觀光揚烈之深心則志而治道具焉矣受事以來早夜兢兢

國初典制之大請之部臣邊圉諮之鎮帥內地則二三有司分歷考究爲圖有九爲志三十有二事舉其綱詞規其質仰見

列聖謨烈之顯赫昭融深懼固陋不文不能頌揚萬一伏惟石渠天祿珥筆之臣必有潤色大業黼黻休明者從茲傍搜博覽以期明備焉將留都名勝之盛與

祖德

宗功並昭垂於奕世斯固中外臣庶所拭目欣瞻也夫康熙二十三年甲子仲夏奉天府尹

臣董秉忠

謹撰

皇清勅修山東通志六十四卷 山東巡撫

臣張鳳儀序鳳儀受節鉞撫東省之踰年奉

上命輯輿地書惴惴栗栗乃屬藩臬監司諸君子曰國憲大者孰逾於茲卽無論吾輩簿書塵勞掌故疎闕而東省諸文士不皆史才事典核辭雅馴豈必一一盡懸之國門求其釐然秩然得卒業而無憾猶兢兢乎難之也於是左轄施某檄取諸郡邑乘閱數月始前後至集諸文士共厥事將告竣余以憂去雖未得獻之

闕下然受事已匝歲矣例有序儀嘗謂東省志難有數端孔子曰吾志在春秋是紀述之文昉自尼山當其時彙百二十國之寶書考二百四十二年之行事筆則筆削則削高賢如游夏不能贊一辭左氏公穀氏各爲傳與微言大義時有所牴牾不盡合故天下後世莫能繼漢魏以下如晏謨酈元伏琛于欽之徒或次其山川或次其風尚或次其生長州里等之稗乘叢談而今之學者又多不及晏酈伏于諸人慨焉登壇網羅前代之舊聞咨詢當世之遺老裒益多寡斟酌詳略求無愧於先民有敢於後覺其難可知也孔子曰文獻足則能徵東省兵燹頻仍絃歌甫作檄諸郡邑志或以補罅應或以續貂應甚且漫以無文具應而六郡百四州邑之參差至者僅謀野而獲舊通志斷自嘉靖之癸巳閱百四十年世代鼎革人事滄桑於例爲因可因者無

幾於時爲創可創者莫信有可已而不得已得正而莫正者事不必盡與昔異而體無敢淆人不
必盡與昔同而義無敢濫省裁於郡郡裁於邑其難可知也山左名區羣賢彙生儒俠異趨文
武殊塗議論紛紜學術同異事匪一揆勳皆各奏迨至百年以還甘陵之部已分元祐之黨弗
解門戶競張神羊莫辨欲使隸著作之林者義取春秋評高月旦索君子之微原罪人之過其
難可知也禹貢青州鹽絺鉛松怪石管子衣履被天下漢尙方機紉出自東土唐宋猶然迨自
金元來悉匪其舊矣一望汙萊物力幾盡儼然師尙父初賜地澤鹵人民寡之時今按圖而稽
之非守株刻舟之見乎其難可知也是故數十年間薦紳先生文學子衿所徘徊瞻顧展轉靡
寧惑焉自阻而不敢從事於茲也今幸承

聖天子垂太平之庥建中和之極損益百王紹隆夏古納閣臣之請紀山川以誌其疆紀人物以表
其績紀政教風化文章典籍以綜其炳炳蔚蔚之烈儀等於爽鳩大庭之墟訂軼聞飾新觀以
正名辨物體國經野之模陳於

天子猗歟休哉何所遭之隆也或曰是僅取其文焉爾儀則拜手稽首曰幸矣幸矣此非聖人之邦

乎是天下學者所歸宗也敢曰竊取其義哉能取其文則乘櫓机陞乎其後矣尙何求歟

皇清勅修河南通志五十卷

河南布政使

李森先序歷代有史郡邑有志紀事焉爾周官職方掌

之史詳大志詳小土物方言義取乎其備也然則美惡並書史氏法也志何以書美不書惡各
言其鄉諱辭焉爾古者西都鎬東都洛惟梁始汴有宋京之天文誤以房心分野何誤乎爾周
南則柳汝南則張召南則氏汴毫則角亢魏衛覃懷則壁室星躔四方豫州天下之中禹貢包
絡九州至秦郡縣星離豆割豫且析而爲百廬雜莫紀扶風志輿地文始粲然全豫有志何昉
乎爾明洪武朝成地志一統志省會亦各以志進中原文獻其首庸也書地類從今名系古建
置何居一開封也言春秋鄭衛不知言戰國梁魏不知言秦三川不知言漢陳留不知言隋汴
州不知言宋東京金南京元汴梁不知則其他可知也維周卜洛封國如置碁爲杞爲項爲沈
爲郕爲鄆爲柏爲房實封子共伯申伯胙國虢國沙侯息侯聯綴其間志紀縣不紀國者何志
以代作人自紀其代重王會也九州之外更有九州豫州九州之中其云中者中中土也東則
南潁南宿或大名之內黃滑縣皆稱衛地南則湯陰鄴於濬濬本於衛南陽鄴於襄南陽本楚

與鳳陽接壤則汝之上蔡猶是鳳之下蔡也西則陝之華陰楚之鄖縣若壺關陵川絳州戰國
晉地三分是魏土卽晉土也北則堯之曹縣廣平之邯鄲曹宋魯齒秦所置邯鄲郡者彰也書
山者何嵩嶽而下王屋太行桐柏嶺峪次之書水者何黃河而下伊洛澗瀍溱洧淇澳次之形
勝必書中原之險易出其中關梁必書中原之要害出其中古蹟必書中原之流覽出其中風
俗必書中原之淳澆出其中土產必書中原之方貢出其中宮觀廟墓必書中原之憑弔出其
中名宦流寓人物必書中原之傳人傳政攷古鏡今出其中至如戶口之贏縮以世殊賦役之
重輕以代異尤志之所宜詳其不得而詳者何也戶自有冊賦自有書詳乎彼者不詳乎此也
志何以必修今修昔後又修今此而不修前事存後事闕是有志無志也歲月浸久字磨板軼
必務新之此而不修遺文湮滅是有志無志也貯板於公廩蟲蝕之晷湮之雨腐之甚而火之
兵又斧之煙雲飛蕩是有志無志也豫省之志多廢何也明季流人煽毒號闕中州者幾二十
年掌故悉焚余奉

簡書荒度茲土所過郡邑得舊志僅什之一且殘落不可以讀慨然思復之至汴晤撫軍賈膠侯

已先我而編其志甚偉今

天子撫有區夏東南一尉西北一侯幅員之大前古罕聞行且廣輯輿圖纂成全志爲昭代鉅觀則省會獻書殆自此一方始昔鄧侯入關止收圖籍朱考亭所蒞必先修志乘賈之斯舉亦此物此志也余乃得藉手名藩如古輜軒之使蒐採方聞以共觀厥成於不朽矣

皇清勅修山西通志三十二卷

山西守道

臣

焦榮序山西地屬京師之右藩幅員數千里戶口數

百萬其郡五其州直隸者三其州縣之分隸者九十有四其山恆霍太行其浸汾澮沁漳潞沁桑乾大河爲之衣帶其蔽雲中鴈門樓煩之屬其跡唐虞夏后氏之都其利形鹽水晶國用之自出其人物名臣良將文章理學磊落英多之彥其民勤其土朴其風俗勁而易儉而思若延陵季子之歌風而聽者至於今猶未盡異也予於庚申歲受

簡命爲傳使者凡省之郵亭頓具芻蕘遞騎之良調驂駁咸當閤按勾考因得徧履臺駘郇氏之墟眺覽其河山風物緬然懷之先是壬子秋

皇上俞輔臣請纂修

大清一統志晉大憲會諸僚雜議僉曰山西有志權輿於前成化時胡公謚其後一輯於嘉靖癸亥再輯於萬曆辛亥迄今又七十餘年矣雖山川城郭無改於舊然中更兵燹焚突滄桑隔閼之餘官師之改遷生齒之登耗日異而月不同今欲舉而修之功博而費無經雖然文獻放失君子之憂官於茲者庸敢不勉於是督學劉慨然以爲任自撫軍以下至於諸守令咸減俸相欣擇廣文之才者儒士之良者使治其事循舊章補新牘蒐討軼聞網羅排纒綱舉目張書旣成謂予當有言予於是有感焉禹貢冀州之田居第五而賦最上今日地勢旣殊損益亦宜時易矧夫山谷沙鹵之區風霾時作雨澤愆期頻年旱雹歲稔乏食晉之爲晉亦少敝矣幸大臣涕泣而陳

天子撤食而咨發明詔捐田租賑給之使冠蓋相望又易州縣之長慈惠之帥拊循而噢咻之國家於此邦之人不旣勤且渥矣乎而此邦之人亦必有家恩國澤廻蟠漸積於胸中而爲子孫百世無疆之休者在也班氏有言士食舊德之名氏農服先疇之畎畝由此以推天下莫不皆然而是集其足以徵矣

皇清勅修陝西通志

卷

陝西巡撫

臣

賈漢復序憶戊戌歲余出撫豫州豫當兵燹後都邑丘墟

民物凋敝余蚤作夜思皇皇以修舉廢墜爲首務因思古今來因革異宜損益殊制惟是史冊所垂可以昭茲來許矧值戈鋌煨燼之餘文獻淪亡之日乎於是遍檄郡邑各修本志延聘諸名士朝夕編摩以成一國信書壬寅秋余再奉

簡書鎮撫三秦益懼弗克勝荷迨入其境雉堞言言井疆翼翼都人士雍容樸茂有古先王遺風焉其鄉先生有出一編以請者曰惟國有志載諸方策上之天府由來尙矣茲雍志雖有稿本而未成書願更裁正以授之梓顧其中或略而未詳或蕪而不典余於是遍檄八郡裒聚掌故招集英彥芟繁就簡黜陋存雅按圖披覽則見夫華陽鳥鼠無異乎嵩行具茨也澧渭漆沮無異乎河濟淮洛也昆明太液無異乎沙海石淙也帝圖王會兩京之繁縟猶相埒也名世高賢二陝之耆英猶相望也至若幅幘加擴星野攸分沿革旣殊整釐匪易試問今日之雍州城邑之建置若何土俗之貞淫若何戶口之盈縮若何田賦之輕重若何人物藝文之盛衰若何官師學校之興替若何非攷之於今曷以徵信於古非述之於後曷以媲美於前然則雍志之修

夫又曷可以已哉是志創於前朝成化乙未修於嘉靖辛丑萬曆辛亥距今又五十餘年滄桑變易訛舛良多今幸諸君子肆力編葺而余亦得適觀厥成踵豫志而登內府垂信史而昭來茲非此志不爲功余竊附諸君子以不朽矣

皇清勅修江南通志七十六卷 兩江總督臣于成龍序我

皇上御極二十有二年癸亥禮部奉

旨檄催天下名省通志限三月成書成龍承乏兩江總督因董其事江西去所駐劄江寧千有餘里乃檄署江西巡撫布政使張所志草創送成龍審定送部其江南省通志與江蘇巡撫余國柱安徽巡撫徐國相徵屬府州縣新舊各志及先儒先賢著述論建之有關地方應備採拾者開局江寧延聘在籍儒臣及文人宿學通達治體諳悉典故者編纂稽考甲乙次第而成龍等且相與親爲討論焉并董厲在局諸臣就明繼晷敏皇將事計六閱月而書成共七十六卷而成龍以職掌所及當有以序其簡端竊見九州之士宜貢賦載於禹貢中古文尙簡質不事詳贍其後周官所掌三墳九丘與禹貢所載體制不同而秦漢所收列國圖籍時久世遠莫可較

訂嗣後或有所述出自一隅一事不足傳信卽陳沂楊慎所撰山東四川通志亦稱善本又皆私自屬草體例未純

皇上乃渙大號申異命先取各省之志以成一統之志正欲於衆中求其詳於繁中舉其要夫修志之役必始於縣縣志成乃上之府府薈集之爲府志府志成上之督撫督撫薈集之爲通志通志必歸之禮部然後輯爲一統志於是無所不該山川貢賦土產人物之類無所不備上下數千載使之瞭如目前然則通志之舉其事不綦重而爲之不綦難歟且江南之視各省纂集雖均而難易懸絕何也各省通志原有成書而江南絕無所本事屬創始未易周匝雖窮搜博採豈無絙漏其難一也孫吳六代以逮明初其經國大猷代各異制披尋史乘浩如煙海旁考別紀又多舛誤稽辨雖勞詎協至當其難二也江左人物甲於四方偉人駿烈尙疑遺佚至如節孝隱逸悉存姓氏旣恐淆雜欲裁訛濫慮沒幽潛其難三也所見異辭所聞異辭紀載歲月遠於春秋虞初雜志任情好惡志家之體無容疑誤並存裁量之能豈盡銖黍不爽其難四也大江左右僑立州郡分隸不常命名變易考往已多無徵準今何由參覈其難五也而成龍等又

古今圖書集成
以迂疎不學之才兼以簿書塵冗之苦短絆汲深曷能勝任唯是祇承

詔旨與同事諸臣其詳其慎纂集成書或止足以備一統志之採輯其未敢自信爲良史也顧成龍等幸託唐虞之盛世依附臯益之末光使樸儉鄙陋之所纂輯得備崇文內庫之目以垂不朽實有榮幸焉是爲序

皇清勅修浙江通志五十卷 兩浙督學臣張衡序蓋聞史以表一代之治體志以備一方之掌故

則臚陳其地之本末條分縷析用以考鏡今昔風會之異同生民之休戚賦徭之輕重人物之盛衰不可苟也我

皇上御宇聲教四訖車書一統輿圖之盛近古未有茲浙省肅遵

功令纂輯通志告成而余以備員典學亦與編摩旣輟簡敢拜手颺言曰美哉浙地負海枕江天目爲屏具區爲帶并包甌越錯壤吳會土膏而澤山水秀麗誠天下之粵區而東南一大都會也自

皇清定鼎特設大臣以節制之宿重兵以彈壓之元戎守卒碁布星羅庶司百執承流宣化山陬海